

黔陽縣志卷五十三

賢淑傳

列女傳首列母儀謂宮壺之教化自刑于也然窮巷荒村可為風俗人心勸者抑豈少哉因仍舊志例合編之而以賢而有才者別列於後

賢媛

國朝 向氏段國彬妻貢生向學傳女孫生員文經女也自幼讀書能文親訓二子朝統朝紀為諸生兼精星理推測不爽卒年七十

舊志

曾氏蔣上登妻曾思偉女孝養翁姑家豐不忘勤儉年既七十猶日事紡績夫先氏歿家法凜然子孫內外數十餘口同居不聞諍

語舊志

黔陽縣志卷五十三

賢淑傳

一

湯氏蔣芝苓妻湯尙昭女勸夫專心力學綜理家務不辭勞瘁產頗饒勸夫勿與人爭有不明者悉讓之性尤徽柔歸蔣六十餘年

未嘗疾言遽色

舊志

楊氏廖日寬妻孝養翁姑數十年無違禮夫嗜酒喜客氏中饋供職始終不倦子孫奉慈訓皆振奮自立子大權大校孫開燮俱名

噪庠序

舊志

廖氏潘士權妻事翁姑以孝稱權好客喜遊氏綜理家政操作不怠嚴訓諸子生平不喜佛卒年七十五

舊志

向氏唐仁溥妻夫先歿家計蕭索翁姑並六旬氏以紡績孝養二十餘年持身端謹言不外聞性儉約除養親外絲粒不浪耗故晚

年家日饒子義疇奉母訓惕若嚴師

舊志

賀氏蔣自光妻自幼歸蔣事姑承志戊戌歲旱命子文芹日爾族

繁飢者不能盡周至親須量給之及歿賢名藉甚

舊志

以下新增

雲宜人楊洪妻父彤太學生以外孫兆杏官 馳贈文林郎湖北

武昌府通山縣知縣母孫氏 馳贈孺人氏幼受學於季父建德

令雲路通孝經女史箴歸洪善事舅姑及庶姑黃曲盡孝謹洪慕

遊代養凡奉老持家惟氏是賴靡不委曲調護教子口授小學毛

詩四子書始就外傳比塾歸挑燈課讀夜分不輟嘗勉使為有用

之學子兆杏兆李用成名宦兆李出嗣早仕以官 馳贈孺人

晉贈宜人

金宜人楊兆李繼室父象震任華容黃家穴巡檢以氏來繼躬炊

爨與妯娌雜操作兆李留京六載氏藉鍼黹養本生翁姑甘旨無

缺及需次梁園夫兄弟先後挈眷至內外無間言屢隨劇任無敢

一語及苞苴者訓子孫不事姑息待下有恩子筮仕恆以當學祖

黔陽縣志

卷第五十三

賢淑傳

二

父清廉諳諳勸勉篤恩誼凡族戚來依者皆婉留厚贈男使讀書

官齋女為資嫁必曲成乃已好施濟夫某僚友以非罪鑄職氏脫

簪釧助夫援拯時義士有賑校場郵孕婦收病民諸舉氏捐貸首

倡闔家竭助三百金晚家省垣每值秋闈命孫輩捐備黔邑卷資

壽八十有三以夫貴 勅封孺人 誥封宜人

易氏楊達妻年逾三十達故謹事翁姑教訓孤子清節同欽會大

吏搜採節孝族紳欲以聞緣限於例深為歉然氏日縱便如例亦

婦職豈為名耶年八十子孫欲款客稱觴氏以銅灣渡船為言乃

移為修渡置田之用及工興氏親往視今遂以易氏渡名邑紳危

元福易良俶皆有序

易氏楊椿芳妻年三十一椿芳歿茹苦履素撫孤成立事親色養

兼至侍兄嫂恭而有禮尤矜恤孤貧下至微物弗忍戕傷好行善

而不佞佛識見過人溫恭淑慎人呼爲活佛子興昶庠生能承母志

陽氏楊琦芳妻孝事孀姑操持家務能盡婦道里有紛爭輒以紡績所得遣人排解諸子多有聲於庠一家七十餘丁同堂和睦皆氏教育成之年八十六終

陽氏楊昌綬妻初綬病篤子茂菁僅週歲指謂氏勿溺愛必使讀書吾目瞑矣稍長課讀甚嚴教訓有法事孀姑竭誠盡孝人無間言性尤仁慈好濟窮之年六十八而終

潘夫人衛守備蔣玉蘭妻家素封被服如寒儉而好施予崇板溪石橋所費甚鉅獨力爲之壽八十歲終以子龍章由遊擊銜加二級 誥封夫人

謝氏庠生楊鶴芳繼室翁姑性嚴重氏隨夫先意承志撫前室子

黔陽縣志

卷第五十三

賢淑傳

三

愛逾所生以是益得堂上歡鶴芳貧而好客氏典衣質釧無難色嘗病風痺力疾操作內外經營俾夫與子得一意於書三子興靈以兄興川能繼父祖業所有悉推讓之婦陽氏亦明大義人謂淑德所致云

黃氏易紹蒸妻十八歲于歸卽能孝事翁姑年二十翁姑俱逝家人促分爨屢勸不獲已輒各利所有氏語夫云貧富有命區區值幾何願勿與較也遂止得破屋一間做物數件怡然以安紹蒸躬耕于田氏日饁之涉溪偶跌由是得足疾教子嚴切微過必杖責之里人極稱其賢壽八十一歲終

伍孺人陳永貞妻逮事重闈克盡孝敬姑廖衰老氏伴寢處者二十餘年姑喜弄孫曾氏羅致果品玩好命諸孫博其歡笑理家勤儉善處妯娌晚歲生辰必節所費以修道路其賢惠如此子昌材

拔貢生以甯鄉教諭 覃贈孺人

丁氏增生楊杏芳妻素賢孝逮事重闈及繼姑皆能得歡心姑病服侍不懈常倚爲命家貧杏芳屢赴試典衣資之後小康己酉大饑躬自炊粥以給餓者里人多賢之年七十三終

唐氏邱朝燮妻年二十二歲歸邱孝事重闈及兩繼姑克全敬戒性勤儉而好施予子孫繁衍人多頌之壽終七十五歲

楊氏丁執中妻性淑順能承兩姑歡年三十餘無子勸夫納妾弗允氏曰不孝有三無後爲大妾不能育子反爲妒婦耶乃取張氏女氏卽移居別室見張能操作一以家事付之生子愛逾己出教有殷勤張多病先歿及氏死已久其子言及輒潸淚交頤有餘痛者益徵氏之賢淑云

廖氏丁友榜妻性端莊識義理中年夫故遺庶子良熾甫二齡恩

黔陽縣志

卷第五十三

賢淑傳

四

愛如己出及子讀書嘗訓云兒能潛究書義知古今成敗之數人品邪正之分雖不求名而名實在也年八十四歲終榜妾汪氏温恭淑慎令子焚遺券三百餘金壽八十八歲終

楊氏州同羅大訓妻中年無出勸訓納妾李氏亦不育繼納劉氏踰年各舉一子愛甚所生善持家而性好善嘗重築麻池溝茶亭補捐渡田十畝其他施藥蠲租造橋修路力行不倦尤待下以恩無疾言遽色年六十一終

向安人蔣仲斌繼室生子三撫前室子愛逾己出家頗饒日勤紡績至老弗衰年七十一歲終以子鉉光 勅贈安人

楊恭人危有垣妻楊兆杏之女也生於官署恆樸儉自甘于歸家無長物有垣慕遊鄂渚十餘年氏採薪汲水歷盡艱辛而課讀兩子甚嚴歲奉塾師修脯及兒輩買書皆典衣質釵釧以償父與叔

父雖宦顯未嘗一言告貸也及兩子漸貴常舉忠愛二字爲訓故所在有賢聲有垣性嚴毅氏左右調持相夫以道晚年家小康施舍不倦年八十有三終以子錫瓚炳光貴 誥封宜人 晉封恭人

蔣安人段汝鴻妻年十九歸鴻事姑得歡心三十三歲夫故淑慎全婦道教三子以義方聞祖宗祭費不敷遂捐田以祀族嘉賴之尤喜周濟歲施棺槨並出貲助葬他善行多類此子尙焜同知尙煥理問銜 勅封安人

向氏蔣榮城妻逮事重闈得其歡心弟婦孀居氏殷勤調護體恤周至數十年無詬誶聲鄰里賢之子孫多有聲譽序

王氏理問銜向敦本妻王繼賢女兄也生長名門素嫻閨訓及歸向敦崇婦道罔有間言性尤仁孝姑蔣氏患羸疾躬侍湯藥未嘗

黔陽縣志

卷第五十三

賢淑傳

五

廢離見姑減膳輒哽咽不食衣不解帶者數月好樸素而喜施予見貧乏每惻然周給之產育者必給米穀衣服俾遂其生息訓子嚴正朝夕督課以補師隙子敬知早有聲於庠女雲鶴有至性能承母訓以貞孝聞未嫁而逝

唐氏易紹義妻夫早逝事翁姑克盡孝敬鄰里無間言尤善體夫志課子讀書一以嚴謹子舜謙歲貢生

劉氏監生楊芹芳妻中年夫故遺二子教以義方翁老能事以禮備極孝謹嘗謂家人曰婦人之道潔身自重外養舅姑治組紉酒食是議而已持家豐儉得中多足爲閨閫法年八十五無疾而終孫大聲湘陰茶陵教諭

欽宜人教諭向敦仁妻性賢淑姑病侍奉不懈嘗夜禱於神願減已算以代歿年四十三歲以子義田 誥封宜人

譙氏例貢楊景伯妻淑邑譙克家女侍衛萬芳之胞妹也生長富室儉樸好施親鄰貧乏者周恤不倦景伯性剛負氣氏左右規勸事多賴以解奉翁姑尤得歡心壽終八十六歲

王氏鄧子壽繼妻撫前室子九人視如己出次子有明婦蔣氏五子有甲婦周氏六子有第婦向氏年少孀居氏婉言訓誨恩詣甚周一門三寡婦俱無異志人以是多氏之賢

楊氏廩生廖華妻家貧華頻年舌耕在外姑老多病賴氏侍奉嘗以紡績鍼黹所得供甘旨無缺性尤賢惠晚稍裕周恤親鄰貧乏不少吝歿年七十二歲

廖安人向世彬妻逮事重闈孝順無間性儉樸而好善樂施無稍吝鄰里賢之以夫理問銜 勅封安人

李氏監生馮代信繼妻舉人李宗策女翁青年夫故無嗣遺有薄

黔陽縣志

卷第卅三

賢淑傳

六

產人爭覬覦之氏內綜家政外恤族鄰越數年始獲撫堂姪千廷為後教育成立家亦漸裕性慈惠鄰里有爭聞輒託人解釋貧不能育女者贍以銀米擔挑至門度其飢寒故誤厚與之值居宅外舊有賈肆每令子持錢囑主人凡力不能湊價者計數取償於已他善行多類此咸豐辛酉粵逆窺境紅蓮坪焚掠最慘惟氏宅巋然獨存兩幼孫被擄亦脫歸人以爲厚德之報孫家儀優廩生家儒州同

蒲氏向宗江妻宗江孝友慈祥氏能相夫以義樂善好施終身不倦尤喜談陰騭暇輒舉古往事爲兒孫勸戒孫圭田優廩生楊氏向宗望妻孝事翁姑持家勤儉晚稍裕尤好施與子七世珪世亨俱庠生世盛由武舉選授山東登州鎮標都司人以爲母教之善

才淑

明 馮氏楊世忠妻世忠洪武時人宦游福建有傳見文學氏家

居紡績課子殷勤能詩有寄夫手帕一絕人多傳誦按詩云幾度

新詩寄與宦游人雖然不及
迴文錦也是迴腸淚滿巾

國朝 楊戴錦石一里楊文女性賢慧諸父昆季皆宿學氏以故

博通經史評點綱鑑獨具卓識善屬文近古作者詩亦清婉適陽

某三載病終著有古香齋詩集稿多佚

附存七夕詩一碧銀河天
上流雲端月朗洗新秋神

仙自要爭離別閒
殺人間有莫愁

向素廉監生廖恭仟妻歲貢生向才瑞女幼讀書解吟詠笄而于

歸能盡內則體弱善病自慮無嗣勸夫買妾有子如已出年逾四

旬生一女旋舉兩子人謂重夫嗣能逮下之報著有植桂軒詩集

桂林龍殿撰啟瑞母黎太夫人采蘋見之歎其清婉贈有序

黔陽縣志

卷第五十三

賢淑傳

七

黃氏廖恭仕妻幼知書能文于歸克盡婦道尤好施鄰里貧乏者

多賴以舉火年二十五生子旋得羸疾力勸夫納妾亦舉子氏好

學不倦女工之餘輒事吟詠稿多散佚存詩三十餘首庶子三銓

編曰萱閣餘墨子三銘中咸豐辛亥武科三銓翰林孔目